

Delegatkinja Nermina Kapetanović postavila je četiri pitanja.

Prvo pitanje, upućeno Vijeću ministara BiH, glasi:

1. Prikaz strukture rukovodnih kadrova u tri stalna tijela Vijeća ministara BiH, i to u: Generalnom sekretarijatu, Uredu za zakonodavstvo i Direkciji za evropske integracije BiH. Prikaz treba sadržavati:

- broj sistematiziranih/popunjenih pozicija;
- kvalifikacijsku strukturu i ukupan broj godina staža;
- datum imenovanja i zakonski osnov za imenovanja;
- nacionalnu strukturu.

Rad stalnih tijela Vijeća ministara BiH je manje vidljiv u odnosu na rad ministarstava. Međutim, odgovornosti i nadležnosti stalnih tijela su od posebne važnosti, naročito u kontekstu provođenja reformi i procesa evropskih integracija. Kako je rukovodni kadar ključni faktor u realizaciji ovih zadataka, odgovor na postavljeno pitanje dat će uvid u stanje i mogućnosti ispunjavanja preuzetih obaveza.

Drugo pitanje, upućeno također Vijeću ministara BiH, glasi:

1. Da li Generalni sekretarijat Vijeća ministara BiH prati izvršenje zaključaka Vijeća ministara BiH?
2. Kada će biti formirana nova Komisija za imovinske zahtjeve raseljenih lica i izbjeglica za nastavak obaveza vlasti BiH na provođenju Aneksa 7. Općeg okvirnog sporazuma za mir u Bosni i Hercegovini?
3. Za četiri godine nerada Komisije zašto arhiva Komisije nije vraćena Arhivu BiH i s obzirom da se ona nalazi u iznajmljenom prostoru, ko je odgovoran (ko je bio u obavezi vratiti predmete Komisije Arhivu BiH i ko plaća zakup tog prostora)?

Komisija za imovinske zahtjeve raseljenih lica i izbjeglica prestala je s radom 1.1.2009. i od tada do danas, i pored zaključka Vijeća ministara BiH da Ministarstvo za ljudska prava i izbjeglice BiH i Ministarstvo pravde BiH formiraju novu Komisiju koja će rješavati preostale zahtjeve stranaka, nije ništa urađeno. Nanesena šteta strankama u postupku pred Komisijom za imovinske zahtjeve raseljenih lica i izbjeglica je nemjerljiva i postavlja se pitanje da li zbog

ovih neriješenih predmeta već imamo tužbe pred Evropskim sudom za ljudska prava.

Treće pitanje, upućeno Vijeću ministara BiH i Ministarstvu za ljudska prava i izbjeglice BiH, glasi:

1. Kada će Bosna i Hercegovina donijeti sveobuhvatni zakon o pravima djeteta na državnom nivou, koji će u potpunosti utjeloviti principe i odredbe Konvencije o pravima djeteta i njenih Fakultativnih protokola, čiji je Bosna i Hercegovina potpisnik, a koji će pružiti jasne smjernice za njihovu dosljednu primjenu na cijeloj teritoriji države Bosne i Hercegovine?
2. Kada će biti nastavljen mandat Savjeta za djecu BiH koji nije obnovljen od 2007. godine?

Na Okruglom stolu o temi "Preporuke Komiteta za prava djeteta Ujedinjenih naroda upućene Bosni i Hercegovini - kako dalje?", održanom 20. novembra 2012., u zgradi Parlamentarne skupštine BiH u Sarajevu, ukazano je na zabrinutost Komiteta za prava djeteta Ujedinjenih naroda, jer i dalje ne postoji sveobuhvatno zakonodavstvo vezano za dječija prava na državnom nivou čime bi bio postignut potpun i direktan učinak Konvencije u državnom zakonodavstvu. U svojim preporukama Komitet primjećuje da, zbog složenosti političke i administrativne organizacije države (dva entiteta, 10 kantona i distrikt), nedostatak takvog zakonodavstva rezultira nedosljednostima u primjeni prava djeteta na teritoriji cijele BiH, pri čemu su djeca u sličnim situacijama podložna varijacijama u ispunjavaju njihovih prava zavisno od područja u kojima žive. Komitet također žali što, uprkos prethodnoj preporuci (CRC/C15/Add.260, par. 13,2005) da se osnaži Savjet za djecu BiH, zbog nedostatka dogovora o postupku izbora članova, Savjet još uvijek nije izabran što je, po mišljenju Komiteta, značajna prepreka za razvoj, koordinaciju i realizaciju koherentnih državnih politika za provođenje Konvencije.

Četvrto pitanje, upućeno Ministarstvu vanjskih poslova BiH, glasi:

“Molim predstavnike Ministarstva vanjskih poslova BiH da mi dostave odgovor na traženo pitanje, te prikaz diplomatske note koju je BiH, odnosno Ministarstvo vanjskih poslova BiH uputilo Vladi Republike Hrvatske vezano za bosanskohercegovački zahtjev za rješavanje problema otpuštenih radnika iz BiH, a koji su radili u Republici Hrvatskoj, te

molim prikaz odgovora, tj. diplomatske note Republike Hrvatske upućene bosanskohercegovačkoj strani.”